

卷一

書名 壽昌縣志十二卷首一卷 據乾隆十九年刊本
 鈔
 撰者 清 鍾沛 修, 清 陸銘一等 纂
 卷一
 內容分類 史·地理·今地志·浙江
 索書號 史部·地理·都郡·197
 編號 B2650500

[彩色首頁1](#)

[東洋文化研究所漢籍目錄 編號: B2650500](#)
[東洋文化研究所漢籍目錄所藏漢籍善本全文影像資料庫 索書號: 史部·地理·都郡·197](#)
[漢籍善本全文影像資料庫文本壽昌縣志十二卷首一卷 據乾隆十九年刊本鈔](#)
 版權所有: [東京大學](#) [東洋文化研究所](#)
[使用上的注意事項](#)

壽昌縣志卷之一

歙州府

知府事加六級紀錄九次吳士進
 同知府事加三級史鳳輝

全鑒定

壽昌縣知縣加一級紀錄四次鍾沛王修

壽昌縣儒學教諭攝訓導事陸銘一

請養在籍原任長汀縣知縣邑人方暨謨全編

壽昌縣儒學廩膳生員毛培

建置沿革

封建變而郡縣因時立制沿革靡常年世
 雖遠大畧可考顧變者制也不變者地與

壽昌縣志 卷一 建置沿革

藝文上

卷十二

藝文下

總目

壽昌縣志卷之一

嚴州府

知府事加六級紀錄九次吳士進
同知府事加三級史鳳輝

全鑒定

壽昌縣知縣加一級紀錄四次鍾沛王修

壽昌縣儒學教諭攝訓導事陸銘一

請養在籍原任長汀縣知縣邑人方暨謨全編

壽昌縣儒學廩膳生員毛培

建置沿革

封建變而郡縣因時立制沿革靡常年世
雖遠大畧可考顧變者制也不變者地與

壽昌縣志 卷一
民也政不限於地治不易乎民變而通之
與民宜之彈丸小邑承流宣化之道存乎
其人焉志建置沿革

壽昌禹貢揚州之域春秋時屬吳後屬越又屬
楚秦屬會稽郡漢因之東漢屬吳郡晉於吳
郡置壽昌縣壽昌之名自此始宋齊因之梁
陳改為新安郡縣隸之隋平陳廢郡置睦州
煬帝改睦州為遂安郡領縣三內有雉山壽
昌併入焉唐復以郡為睦州或為新定郡復
置壽昌縣隸之屬江南道五代屬吳越國宋

以郡為遂安軍節度宣和元年陞為建德軍
三年改為嚴州咸淳十年又陞為建德府縣
隸之屬浙西路元以郡為建德路縣隸之屬
江浙中書行省明初以郡為建安府尋為建
德府又改為嚴州府縣隸之屬浙江等處承
宣布政使司

皇清因之

右括文獻通考及明史語按漢書地理志會稽
郡秦置漢時會稽郡領富春縣後漢書郡國
志順帝分會稽置吳郡領富春縣壽昌故富

春地也晉書地理志吳郡領十一縣內有壽昌則設縣實自此始隋以縣省入雒山壽昌又雒山地也自唐初復置縣山陬僻壤永著版圖至

國朝而久道化成文物漸起矣

又按舊志云漢志吳郡領富春縣丹陽郡領歙縣今嚴州六屬淳安遂安皆歙縣地建德壽

昌桐廬分水皆富春地也

壽昌縣沿革表

總部

郡

縣

虞夏商揚州

周揚州吳越

秦會稽郡

漢揚州會稽郡

東漢揚州吳郡


三國吳揚州吳郡

晉揚州吳郡壽昌縣

宋齊揚州吳郡壽昌縣

梁陳揚州新安郡壽昌縣

隋揚州總管府遂安郡縣併入雒山雒山今淳安



皇清	分野	浙江等處承宣布政使司	嚴州府	壽昌縣
明	祥異附	浙江等處承宣布政使司	嚴州府	壽昌縣
元		江浙中書行省	建德路	壽昌縣
宋		浙西路	嚴州	壽昌縣
五代		吳越國	睦州	壽昌縣
唐		江南道	睦州	壽昌縣

周官保章氏以星土辨九州之地所封封域皆有分星以觀妖祥蓋形成於地象昭於天政治有得失而災祥各以類應仰觀

俯察有修省之道焉志分野

左傳昭公三十二年吳伐越晉史墨曰越得歲而而吳伐之必受其凶鄭康成云天文分野斗主吳牽牛主越此年歲星在牽牛故吳伐之凶

史記天官書牽牛婺女揚州

漢書地理志吳地斗分野也今之會稽吳分也後漢書郡國志註帝王世紀曰自斗十一度至婺女七度一名須女曰星紀之次今吳越分野

〔晉書天文志〕自南斗十二度至須女七度為星

紀吳越之分野屬揚州又云斗牽牛須女吳

越揚州會稽入牛一度

〔春秋元命包〕牽牛流於揚州

〔張衡周天大象賦〕瞻須女之繒室奄開邦於會

稽

〔內緯秘言〕牛三度嚴州建德淳安桐廬三縣入

三分之四女初度遂安壽昌分水三縣入八

分之四

〔明史〕洪武十七年天文分野書成浙江布政司

所屬之嚴州牛女分

〔按通鑑外紀〕黃帝畫野分州得百里之國萬區

以分星次是雖彈丸小邑亦有分野也自漢

以來言象緯者畧異蓋天運有轉移觀察有

遠近故言人人殊然大經終不易也壽昌古

揚州境總不出乎星紀之外至於應分牛女

何度術疎管窺不敢臆斷惟摘叙成書可考

者以備觀覽

祥異附

明

嘉靖己亥山水泛溢人多溺死城鄉房屋漂沒者不可勝計庚子夏蝗甲辰乙巳丙午三歲連饑民掘草根以食

崇正庚辰水溢入城淹沒民居甚眾

皇清順治十八年辛丑旱

康熙十年辛亥旱

雍正元二三年大豐自八九年至十三年俱豐乾隆元年至十八年連熟內十二年丁卯山水偶發十六年辛未旱南鄉較甚 丁卯年西北鄉南山洪發水流入縣城縣市會通橋及

西鄉大同永平橋皆衝塌廬舍間有漂沒

恩蒙賑恤并修建兩橋辛未夏秋偏災蠲賑並施民間含哺鼓腹若不知有災者

疆域形勝附

禹貢九州以山川而別封域周禮形方氏掌邦國之地域以正其封疆自時厥後州縣星羅碁布其與鄰封接壤之處則限以川阜或立界石守土者之所據以為保釐者也可無志乎志疆域

廣輪

廣八十五里輪五十五里

四至 四正 四隅

東至本府建德縣界二十五里以菱塘為界距建德治八十里

南至金華府蘭溪縣界三十里以硯山為界距蘭溪治八十里

西至衢州府西安縣界六十里以鷲龍山為界距西安治一百四十里

北至本府建德縣界二十五里以上過浴山為界

東南至蘭溪縣界二十五里以巖崗山為界

東北至建德縣界三十里以新安江為界

西南至衢州府龍游縣界四十里以梅嶺為界

距龍游治八十里

西北至本府淳安縣界五十里以玳瑁嶺為界

距淳治一百五十里

陸路八十里水路九十里至本府陸路三百里

水路三百七十里至浙江布政司城陸路三

千三百七十里水路四千餘里至

京師

壽昌縣志

卷一

疆域

形勝

七

形勝附

郡志巖山鎮其背艾水環其膺羣峰迴合狀如城郭


元妙觀記水光山色映帶縈繞嵐影參差如幡幢葆蓋

舊志據嚴陵之上游扼歛之險要

方寬嚴陵賦壽昌則萬松抱治青龍遶城

山川

鄭夾谷曰州郡之設有時而更山川之秀千古不易旨哉言乎山川者疆域之眉目



也壽邑無名山大川然亦山水窟也其為名賢托迹文人題咏者山若增而高水若益而深不可以不書也志山川

青龍山在縣東一里由縣治後山蜿蜒而來突出高阜勢若龍之昂首下有潭曰青龍潭舊建塔於上康熙四十九年署縣令陳學孔撤去乾隆九年邑令王兆曾建魁星閣以培文運

西山在縣東十五里山形奇秀右襟淤塌左帶芳溪

岑山在縣東二十里宋國子監丞鄭彥讀書處

徐誼詩九曲岑山九曲奇萬年高樹萬年枝

水盤幽澗通池遠花碍深雲落地遲種竹生

孫添舊譜換茶留客了殘棋監丞去後留遺

跡依舊烟霞似昔時


彭頭山在縣治西西湖之側晴波倒影上下一

色宋秘書郎胡楚材讀書於此

下馬山在縣西五里峰巒綿亘湧出平坂宋直

龍圖閣葉三省歸鄉邑望此山下馬徒行鄉

人稱其恭謹故名



青山在縣西十里逶迤幽寂唐聘君翁洮隱居

之所

天湖山在縣西二十里一名孟塘小徑屈曲而

上者三里山上有池可溉山麓田三百餘畝

藥山在縣西三十里山半有泉清冷瑩澈名曰

藥泉

魏馱山在縣西四十里李頻詩所云魏馱山前

一朵花也

四靈山在縣西四十里一曰龍二曰鳳三曰龜

四曰麟四山拱揖相向其形惟肖宋葉忠簡

公義問居其下遺址猶存至今稱曰相府四
靈山

塘山在縣西五十里石逕屈曲上有二池其水
分流崖壁為瀑布

朱山在縣西六十里昔朱道人嘗繫虎於此有
繫虎壇至今林木蒼翠野火不燒

仙池山在縣南三里一名南山山巔有池真人
卜景雲煉丹處也

鄭山在縣南五里禾疇麥隴高低映帶松竹環
列如畫胡楚材詩突兀雲霞外峻嶒艾水濱

羣峰四朝抱形勢似君臣

石鼓山在縣南七里大石如鼓擊之有聲每歲
穀日扣之鳴其年豐稔

天井山在縣南七里水從山澗注石窟名曰天
井

烏石山在縣南十五里山石多黑其地有廟廟
前塘內一石橫紋界之儼如蓋底俗呼為金
菓盒云是神跡

金臺山在縣南十五里壽之最高山也層巒疊
嶂日將落餘光迴照山頂徐中書有金臺捧

日之咏山之麓吳氏居焉又名吳山

冠山在金臺之南壁立萬仞登之可覽龍蘭諸
邑上有洞洞中出雲則為雨候山之半有冠
山書舍邑人吳銜建

硯山在縣南三十里南屬金華北屬嚴陵西屬
衢州為三州之界

萬松山為縣治北半里松楓蒼翠近市而不囂
明山在縣北五里為縣治來崗巖壁聳秀時見
火光

巖山在縣北六里山峰高數百丈山頂有石回
抱如負辰狀郡志云巖山鎮其背即此山也
密山在縣北七里怪石崔巍人莫能至中有石
窟多蜜蜂

過浴山在縣北二十里下有水洞昔有仙人浴
此歲早取其水以禱輒應邑人方寬詩泉通
石窟蛟潛磬路入楓林虎踞臺

顧母山在縣北二十里兀立水濱頭回如顧
天馬山在縣東南三里兩峰突起中連平崗如
馬鞍狀

赤姑山在縣東南二十里有石赤色截然子立

或云赤姑仙晒紅裙於此（鄭國賓赤姑巖詩）
我上赤姑岑已覺雲踪遠一睨天地開平眺
溪源返裙曳真爛爛石剝常宛宛轉入山梁
道忽度鐘聲晚

玉華山在縣東南二十里崖高數百丈石色映
空如玉（陳恕玉華山詩）種玉仙人久不還玉
華千載尚名山飛泉怪石空青外瑤草琪花
積翠間道士著經時許借鄰翁放鶴每同閑
餐瓊何必藍田遠應有幽期一扣關

太清山在玉華西尤秀麗里人李景顏建太清

堂於麓

奕山在縣東南二十里層巒疊嶂宛若屏障
賭婦山在縣東南二十五里昔有女子居此人
賭聘不得遂化為石

巖崗山在縣東南三十里山有華蓋羅帽玉露
慶雲景星五峰而華蓋最高山南屬蘭溪北
屬壽昌為二邑之鎮山半積雪經春不化（明
史地理志）壽昌有巖崗山

蓮谷山在縣東北里許其形如蓮對山共之如
葉明國子監助教洪鼎築室於此

燕山在縣東北二十里山巔平疇百畝清泉白石有居民數十家

默山在縣西南二里峰巒環拱宋胡楚材以剛直忤權貴歸築室此山今故址猶存

金姑峰在縣東三里峰尖卓立形若鳳翅橫截縣之水口形象謂為巽峰宋榜眼傅崧之詩云金姑山上野花紅往近城東第一峰溪葉香時收白艾山車行處駕青龍明萬歷四十四年縣令張爵應建塔其上邑人諸葛昌襄力為多

金紫峰在縣西三十五里三峰突起宋崇寧中林木蒼鬱異常占者云當有衣金紫者後里人胡彥嘉為吏部侍郎詔贈其父金紫光祿大夫

峙峰在縣東南十里其峰清秀勢若植圭

梅峰在縣西南四十里峰頂望龍蘭二邑境歷

歷在目山有壘號西塢寨乃明初守禦之地峴嶺在縣西二十里(廣輿記)李頻及弟挈妻歸

過峴嶺妻見其險有倦容頻作詩戲之魏馱

山前一朶花嶺西還有數千家石斑魚鮮香



衡鼻淺水沙田飯咬牙

大順嶺在縣南十二里宋進士吳椿年居其下
經方臘之亂以小反名（金華於石詩）泉本至
清誰曰盜溪雖可染却名愚一夫作難隨傾
覆千古青山獨受污


邵嶺在縣北五十里羊腸鳥道上矗雲霄嶺北
為淳安縣境

長嶺在縣東南二十五里（洪龜詩）長嶺頭倦行
役鷓鴣啼秋烟濕斷碑無字生土花青松落
陰滿苔石節節級級如登梯凭高一覽青天

低笑隨猿鶴不知遠但見日落西山西

梅嶺在縣西南四十里平崗逶遲與龍游接境
南宋都臨安時此嶺為驛道凡江閩湖湘二
廣及海外諸國來者皆道其下古有梅嶺鋪
石郭嶺在縣西南五十里崖石嵯峨水泉滴瀝
與衢州西安縣接境分脈而下為錢師山
遼嶺在縣西北五十里嶺極高峻北接淳安縣
界為商文毅公故里


高湖巖在縣東二十五里巖石四匝一徑可通
黃巢之亂土人避其上作大草履擲於路賊



至見一長人立山巔怒目視之遂駭而退
聖巖在縣西三十五里巖壁絕險昔有異人居
此扶巨絙以上下一日牽一犢入巖遂不復
出至今時聞音樂聲巖有石僧其狀尤肖
金雞巖在縣西六十里石中有雞聲好事者剖
之得一雞金色今其竅尚存

紫金巖在縣南十里泉流石窟名曰龍盤

大慈巖在縣南二十里巖縫穹窿可作僧寮有
石筍從地湧出元大德間臨安人莫子淵棄
家居此琢石筍為佛號曰大慈北有石屋從



屋隙梯而上不數武石壁峭立無徑可緣於
畧可容足處以面腹貼壁漸移而過至一洞
可瞰蘭谿之激江題為洞天一覽真絕境也
鄭國賓宿大慈巖詩雞鳴半山曉樹沒前峰
薄獨坐拂禪床看看松子落

獅子巖在縣南三十里仁都陳店之背山高數
十仞石在山頂狀如獅前對硯山里人陳運
淇有句硯屏滌碧澗獅石聳青雲

南山洞在縣西北三十里洞有三門屈曲旁通
極為幽邃

頤真洞在南山洞東半里許石室三間清潔明
爽俯身可入前有池滴瀝不竭

靈棲洞在縣西北四十里洞極深邃盛夏寒不
可禦泉水清澄時見魚躍唐大中初縣令穆
君遊此愛其幽勝微吟云一徑入雙崖初疑
有幾家行窮人不見坐久日空斜得此二聯
思頗遲溢時李頻從行即續云石上生靈草
泉中落異花終須結茅屋到此學餐霞穆深
加賞歎頻由此知名

龜石在縣西十二里狀如龜

鼠石在縣西六十里其狀似鼠

平巖石在縣西北十八里特峙平疇中廣數百
丈古木盤迴叢桂環植有登眺之勝


壽昌溪在縣西六十里發源自鷲籠山東流經
富塘街張村至大同曰大同溪又東流繞峴
嶺至吳潭航頭歷宋公寺從城西而東曰艾
溪又東流繞七里廟至淤場曰淤場溪又東
流經湖岑坂曰湖岑溪其實一水也又東流
至羅桐埠入江明史壽昌縣有壽昌溪東北
流至建德縣入新安江

交溪在縣西六十里發源魏馱山至富阜與長汀水合流過傅村至大同入壽昌溪其入口處有永平橋

曹溪在縣西北五十里發源玳瑁山與赤源胡村諸水合流經下馬山之趾入壽昌溪今俗名入口處為小江溪

西溪在縣西南四十里源出梅峰至顏公橋入壽昌溪今航川村居背也

周溪在縣北十里源出過浴山流經宋公橋入壽昌溪



清潭溪在縣南十里發源烏石山至石壁與爽溪合過南浦與童源水合北流至縣城西南入壽昌溪其岸為潯南李氏居

協儒溪在縣東北十里發源過浴山經至仁橋入壽昌溪

翠溪在縣東五里發源巖峒山與細坑朱村所塘諸水合流抵金姑峰下入壽昌溪

竹溪在縣東南十五里源出長嶺合石泉許村駱村諸水北流經山後村入壽昌溪

五里溪在縣東北十五里源出過浴洞南流至

新市入壽昌溪

龍溪在縣東二十里發源巖峒至湖岑坂入壽昌溪鄭以耕詩溪流環抱碧縈紆好似盤龍護草廬石嚼曉波寒骨露月澄秋水夜光虛按山以東西南北挨叙水則自西叙起者壽昌溪自西而東其入溪諸水亦當以自西而東為次使水道易尋也閱者鑒諸

常樂溪在縣南三十里明史壽昌縣有常樂溪東南流至蘭溪縣入東陽江


風俗

上行下效謂之風服先食舊謂之俗風感於上而俗成於下禮曰天子巡狩命太師陳詩以觀民風易曰省方觀民設教故崇雅黜浮範世軌物者責也不有所稽政何由達志風俗

圖經山高水深人性貞介

舊一統志俗號輯睦人和習馴民貧而嗇多文學之志

舊郡志邑界四山之中地狹而瘠民嗇而野舟車不通無魚鹽貿遷之利故其俗儉而易足



然頗惑於鬼神

士知自愛以請謁上官為耻衣惟布素近間有服紬綺者

山田硤确農夫終歲勤動以禾稻為上佃主田者每歲輸稻穀於主其餘荳麥雜糧田主不過而問也

逐末者間有之遠不過至會城而止業柴米薪炭無珍玩之貨

婚禮六合行者納采請期奠鴈耳俗名納采曰上門其禮極簡婚家惟具名帖媒氏及親賓

數人往拜而已近富室間有用綠幣者既上門則婚姻成續後婚家復多具名帖往拜謂之下帖其時乃餽聘金羊酒等物 請期俗曰送日子書 奠鴈亦僅存其名吉期設鼓吹綵輿往迎俟著後入房合巹曰飲交杯酒 第三日遍見舅姑尊長謂之拜三朝蓋即古者三日廟見而後成婦之意按文中子曰婚娶論才君子不入其鄉司馬溫公曰娶婦必須不若吾家者壽邑風尚朴素近頗華靡甚有窺其奩奩豐富而後聘者否則雖阿谷之

賢漆室之智弗問也此類風也君子當力挽之

喪延黃冠設醮上章俗云做齋亦有用釋子者元旦男女夙興肅衣冠祀祖卑幼拜尊長戚里交拜曰拜年爆竹開門向吉方行詣神廟日出行

元宵 正月初八九日至十六日止以布罩竹畫鱗甲為龍形長可數丈燃燈其中宛轉戲舞曰龍燈以竹作骨紙糊之作馬形縛於身之前後燃燈其中馳驟歌唱曰馬燈又有假

婦人弄參軍之戲曰唱採茶小兒以禽魚花菓器具雜物製燈手提之鼓吹鳴鑼嬉遊巷陌間祠廟街市止於十四十五十六放燈三夜多有連袂接踵而出觀者

清明 插柳記年華祭墓標紙錢於壟謂之祭掃

端午 五月五日懸艾葉菖蒲門戶間飲菖蒲雄黃酒塗硃黃於小兒額用紅布為兜裏以縛兒胸并作艾人蒲虎之屬彼此相餽

中元 七月十五日設素饌祀祖先本浮屠氏

孟蘭盆會之說

中秋 以月餅相遺對月邀飲曰賞月

重陽 九月九日萸葉裹秫米為角黍蓋端陽節物移在重九也

小除 十二月二十四日以竹枝掃堂宇夜祀竈神曰謝竈

歲除 十二月三十日俗云過年庭戶皆貼春聯懸先人遺容於堂供設邊豆至暮合家聚飲曰分歲飲畢卑幼拜尊長曰辭年

田賦戶口 物產附

唐制有租庸調租者所云粟米之征也調者布縷也庸者力役也自時厥後田畝有賦男子十六歲謂之成丁丁亦有賦累代以來未之或改

國朝厚澤深仁薄賦輕徭丁隨糧派凡民之有田業者既寬然作息其無田業者更無絲毫之擾踐土食毛者可不知

皇仁之浩蕩乎志田賦戶口

原額田壹千貳百陸拾伍頃柒拾貳畝柒分零乾隆肆年詳准溢田叁拾壹頃叁拾壹畝柒

分零乾隆十二年詳准豁田壹千貳百伍拾
叁畝柒分零實徵田壹千貳百捌拾肆頃伍
拾畝柒分零

原額地伍百伍拾肆頃陸拾壹畝玖分零乾隆
肆年詳准缺地壹百六十叁頃陸拾畝玖分
零又乾隆拾貳年災案詳豁水衝石壓地壹
頃叁拾捌畝陸分零實徵地叁百捌拾玖頃
陸拾貳畝零

原額山叁百柒拾捌頃捌拾貳畝壹分零乾隆
肆年詳准溢山壹拾叁頃捌拾叁畝玖分零
實徵山叁百玖拾貳頃陸拾陸畝零

原額塘伍拾柒頃玖拾捌畝零乾隆四年詳准
溢塘肆頃壹拾叁畝肆分零實徵塘陸拾貳
頃壹拾壹畝肆分零

原額湖貳拾壹畝肆分零乾隆四年詳准溢湖
叁畝肆分零實徵湖貳拾肆畝捌分零

原額市民人口叁百伍拾肆口市民人丁伍百
柒丁鄉民人口貳千肆百貳拾玖口伍分鄉
民人丁肆千陸百肆拾叁丁以後滋生人丁
節次欽奉

恩詔永不加賦

以上田地山塘湖人丁等項實徵銀壹萬捌千肆百伍拾叁兩肆錢伍分零田地貳項徵米貳百玖拾玖石壹斗陸升零拆銀叁百伍拾捌兩玖錢玖分零外雜賦不入地丁徵銀壹拾貳兩叁錢零共銀壹萬捌千捌百貳拾肆兩柒錢肆分零


又各年陞科地貳拾叁畝捌分零徵銀柒錢壹分肆厘徵米肆升陸合壹

白其銀總入前項地丁數內

其未另批起解嚴協右營充米

起運項下

一解 藩庫地丁銀壹萬陸千伍百肆拾貳兩



陸錢捌分零又 戶禮二部項下蠟茶路費

等銀叁拾叁兩陸錢叁分零

一解 糧道淺船負具本折月糧銀陸百捌拾

肆兩捌錢玖分

一解 本府驛站銀叁百玖兩壹錢

存留項下

一司府縣存留共銀壹千貳百伍拾兩壹錢貳

分


物產附

桐油 柶油 柶燭 麻 靛

(按)禹貢九州多記方物此物產之所由名也然必此土獨有而他處無者乃可言物產壽邑瘠壤畧無奇珍姑依前志稍記數物然如麻靛兩種亦自近年江閩蓬民有之前此未之見也其他薪蔬禾稻之類方州皆同概從芟

坊鄉

壽邑壤地褊小然近而坊巷之分布遠而鄉村之聯絡皆度地居民之遺意也于今崔苻無警夜戶不閉設有談古人之村建



一鼓樓此村擊則彼村應頃刻聲聞百里者亦贅語矣烟大相望可謂和樂者乎志坊鄉

坊

宣化坊在縣前東偏

敷政坊在縣前西偏

政平坊

明德坊俱在縣東

遵化坊

平安坊

存善坊

南洲坊

清泉坊俱在縣西

仁和坊在縣南

通元坊在縣東北

仁壽坊

湖山坊

新亭坊

澄清坊 俱在縣西北

街

興仁街 在縣治東達東門

由義街 在縣西治達西門

南街 在縣南治達南門

新街 在縣治前照牆後

巷

劉家巷 在縣治東從學宮西下馬牌往南達政平坊

醋坊巷 在縣治西北自赤姑嶺達北門南達諸葛姓祠堂俗訛為四方巷

攀桂巷 在會通橋下舊學宮側

南橋巷 在會通橋上李姓祠堂側

鄉

至孝鄉在縣城及縣北舊轄里四求忠郭邑白艾清化改轄都四在城坊都壽都在鄉十二

都十三都

仁豐鄉在縣東及南舊轄里五直義永昌支干歸業嵒山改轄都四一都二都三都仁四都

壽昌鄉在縣西北及西南舊轄里五鳴謙濟陽康寧義昌永福改轄都四壽四都五都十都

十一都

永平鄉在縣西舊轄里八依仁興賢文昌清泉富文鵬搏百勝思齊改轄都四六都七都八

都九都

庄

雍正六年奉 憲檄編行順庄改都圖為鄉庄

在城曰東門桑園學前新街南隅後街西隅

彭山尚義等庄東鄉曰厚堂湖岑新市燕山

過塘石嶺石泉駱村山後姚村新街淤塌七

里廟桂村坂等庄西鄉曰灘下石板破墘大

山航頭曲斗吳潭久山大同下宅韓家張村

溪口盤山祝家富塘禹田勞村覺寧交溪長

林後童山坑管村南山翁南山洪商家赤源

胡村等庄南鄉曰溪南童源南浦烏石排塘

吳山陳店常樂蔴車下金白下等庄北鄉曰

小山棗園周村項墩上倉楊柳過浴陳源等

庄共編四百八十五庄

城池 寨司附 漁武場附


易曰王公設險以守其國鑿池築城吾圍

固焉壽昌僻居山谷安享太平宵柝無驚

里閑不鑰何藉乎重関之設耶然三里之

城廢址宛在及各鄉寨司舊籍有之不可

以不書也志城池



縣城北倚松山從松山之麓折而東而南前臨
 艾溪折而西逕彭頭山而合於北焉有四門
 東曰興仁舊令彭汝成建西曰宣泰舊令吳
 棠建南曰嚮明北曰拱極亦彭令建向係土
 垣明崇正十二年舊令阮振中易以石門皆
 建樓

國朝康熙十年知縣羅在位重修今雉堞皆圯厥址
 尚存

寨司附

硤巖寨在縣東南二十里赤姑山

長嶺寨在縣東南二十五里桃平山

西塢寨在縣西南四十里梅嶺

杜田巡檢司在縣西四十里大源口

上梅巡檢司在縣西南四十里梅嶺明史壽昌

有杜田上梅兩巡檢司

按舊志云已上寨司明初嚴郡首歸附而金衢
 二州尚梗乃設此及二州既附不復設矣

演武場附

演武場在西門外

橋渡

徒杠輿梁載於夏令剡楫剡舟成於易象
此王政之一也壽昌山水疾激深厲淺揭
徒涉為虞一葦之航畧約之設其利賴者
多矣志橋渡

會通橋在縣治市中跨西湖唐令戴筠建宋理
宗時里人劉登仕重建明洪武六年知縣彭
子冲累石醜水為二道建屋五間景泰中邑
人翁志常重建嘉靖中水决志常後人德靜
如臯等重建植石柱水中架木為觀音閣有
登覽之勝

國朝乾隆元年閏壞於水十二年橋復漂没知縣王
兆曾詳請

帑金重建石橋

至仁橋在縣東五里以居至孝仁豐二鄉界也
其水深碧又名碧坑橋

七里橋在縣東七里其上有廟

淤塌橋在縣東十里累石為十二洪上置屋四

十間元靜盧寺僧鎮建明景泰五年邑人翁

志常重建後廢今為木橋按僧鎮當雙名車云
鎮疑脫今從舊志

湧坑橋在縣東十五里宋嘉定中邑人鄭托信

建

山後橋在縣東十五里明嘉靖間知縣陳元建
宋公橋在縣西一里宋郡守宋鈞倡建故名元
靜盧寺僧鎮重建嘉靖中廣安寺僧太祥建

石洪十二

國朝康熙九年署縣事遂安丞重修乾隆初宋公寺


僧德高復修

按遂安丞舊志失名以張
熙明倫堂記者則石振

玉也

顏公橋在縣西十里初架木為之俗名航頭橋

宋郡守顏公易以石今廢唐里人翁兆春日



題航頭橋詩故園橋上絕埃塵此日憑欄興

自新雲影晚將仙掌曙水光迷得武陵春薛

蘿煙裡高低路楊柳風前去佳人莫怪馬卿

題姓字終期雲雨化龍津

永平橋在縣西二十里為西鄉通衢宋時里人

鄭穎建明嘉靖中勞村劉儼重修

國朝乾隆十二年壞於水知縣王兆曾詳請

帑金甃石

大同橋在縣西二十里宋邑人葉三省建鄭穎

重修後廢今為木橋

珍石橋在縣西六十里

南溪橋在縣南半里為南鄉通衢邑人翁明建

翁穆重修後廢今為木橋

廣濟橋在縣南十里三道明景泰三年邑人徐

彥銘建後圯李親重建

霽月橋在縣南十里今廢

爽溪橋在縣南十五里景泰元年邑人吳叔文

建

南浦橋在縣南十五里景泰四年邑人徐永淳

建

峽山橋在縣南十五里景泰中邑人吳叔文建

嘉靖中圯叔文孫御重建山溪幽邃有峽山

廟

葉墩橋在縣南二十七里明嘉靖中邑人陳奇

吳御建

周溪橋在縣北十里嘉靖間知縣陳元建

朝京橋在縣東南一里跨白艾溪長五十四丈

累石醜水為十二道宋景定間知縣黎舉德

率邑人徐南一等建今為木橋

翠溪橋在縣東南五里宋端平間里人葉常管

建

八鼓橋在縣西南二十五里有石鼓八

排山橋在縣西南二十七里

曲斗橋在縣西南二十八里為龍游通衢

梅川橋在縣西南三十里

蔡郎橋在縣西北十五里為胡村源赤源南山

諸處總路

朱監橋在縣西北三十里

項村橋在縣西北三十里明成化間邑人洪景

德建

主簿橋在縣西北三十五里主簿廟前

國朝乾隆十二年洪水衝決知縣王兆曾詳請

帑金修建并築砌岸傍石道

皆喜橋在縣西北四十里明成化間僧淨元募

建橋西有皆喜亭

淤塌渡在縣東十里每歲官定渡夫一名徐誼

淤塌渡詩野水滔滔此會通往來行色具孤

蓬桃花錦鯉千層浪柳絮黃鸝兩岸風明月

滿船天上下青雲萬里客西東如今歲暮無

人渡閔却溪頭蓑笠翁

新市渡在縣東十五里龍游蘭谿兩縣往徽郡者從白艾坂過翠溪橋出山後橋必經此渡至羅桐埠

航頭渡在縣西十里

南溪渡在縣西南半里嘉靖間邑人李仲繼捐貲造舟每歲官定渡夫一名

朝京渡在縣東南一里俗名白艾渡胡楚材白艾渡詩澎湃白艾溪源恐從天落灘石劍戟列噴怒波勢惡篙工手眼親飛舫過如撐達阻有長橋輕虹逗寥廓參天樹列幢夾岸山

削中有釣魚郎扁舟甘寂寞幾多紅塵客問此何定樂不釣滄海鼉須膾潮州鱸胡為持一竿默默艾溪脚我且笑不答自歌還自酌日暮鼓柁歸風埃滿城郭

壽昌縣志卷之一

壽昌縣志卷之二

嚴州府 知府事加六級紀錄九次吳進士
同知府事加三級史鳳輝 全鑒定

壽昌縣知縣加一級紀錄四次鍾沛王修

壽昌縣儒學教諭攝訓導事陸銘一

請養在籍原任長汀縣知縣邑人方暨謨全編

壽昌縣儒學廩膳生員毛 培

公署

縣有公署聽政者之所寓趨事者之所歸也秩有崇卑制有大小惟其稱也壽昌建